

Cussegl dal public SRG.R

■ (cp) **A chaschun da l'emprima seduta è il Cussegl dal public SRG.R (CdP SRG.R) sa fatschentà tranter auter cun il nov studio da televisiun da RTR Radiotelevisiun Svizra Rumantscha a Cuir. Ultra da quai ha il CdP SRG.R cumpareglià la purschida publicistica da RTR cun auters chanals d'infurmaziun. El ha laschè s'infurmar da la strategia RTR e da la lescha federala davart radio e televisiun (LRTV).** Il parlament federal ha revevì il LRTV e deliberà quel l'atun 2014. L'Uniun svizra d'artisanadi e mastergn ha fatg in referendum cunter la revisiun. La votaziun dal pievel è ils 14 da zercladur 2015. Ils midaments ils pli essenzials èn ina sbassada da la taxa da recepciun per las chasadas e las interpresas, la dismessa dals controlladers da la Billag ed ina reducziun dals custs administrativs. La critica da l'Usam sa drizza en spezial cunter la tariffa tenor memia auta per las fatschentas grondas.

Nova cumparsa per il studio da televisiun da RTR

A partir dals 19 da schaner 2015 emetta RTR Radiotelevisiun Svizra Rumantscha or dal nov studio da televisiun. Quel correspunda tecnicamain sco graficamain a las novas pretensiuns. Cun ils gronds visurs e la posiziun centrala da las maisas

da moderaziun para il studio a Cuir pli grond e modern. Il Cussegl dal public SRG.R è fascinà da la reorganisaziun dal studio. En barat cun ils responsabels da program èn vegnidas tschentadas dumondas areguard l'estetica da la maisa da moderaziun, la tscherna dals maletgs da la culissa, la posiziun da las tavlas dals numms e l'illuminaziun dal studio.

Nominaziuns premi schurnalistic SRG.R 2014

Il Premi schurnalistic SRG.R onurescha products schurnalistics da la chasa RTR. La giuria, che consista da tschintg commembers dal CdP SRG.R, ha tadlà e guardà tut las 30 contribuziuns inoltradas. La giuria ha elegì tschintg nominaziuns per il premi schurnalistic SRG.R. Da questas nominaziuns tscherna l'entir Cussegl dal public SRG.R il victur u la victura. Il premi è dotà cun 6000 francs e vegn surdà per las categorias radio, televisiun ed online. Quai è en questa furma unic tar la SRG SSR. Il premi vegn surdà mesemna, ils 8 d'avrigl 2015 a las 17.00 en la chasa da medias RTR a Cuir. Nominads per il premi schurnalistic SRG.R 2014 èn:
«Punt Tamina Top (Telesguard)»
Fliri Curdin (televisiun)
«Candi-Cartoon»

Kreiliger Peter (online)

«Viver cun ed il medem mument senza sia dunna»

Rominger Violanta (radio)

«Dal Magic Wood al Action Wood»

Rothmund Petra (televisiun)

«Il misteri da Bargun – Cronica d'in maz-zament da chatscha»

Venzin Gieri (televisiun)

Prospectiva

A la proxima seduta, il matg 2015, vegn il Cussegl dal public SRG.R a sa fatschentar cun la nova pagina d'internet da RTR. La nova pagina rtr.ch vegn ad ir online il favrer.

Infurmaziuns davart il Cussegl dal public SRG.R

Il Cussegl dal public è in gremi independent e consultativ che accumpogna la lavur da program ed il svilup dal program da RTR Radiotelevisiun Svizra Rumantscha cun observaziuns e propostas. Il Cussegl dal public fa per regla quatter sedutas ad onn. El observa programs, emisiuns ed era contribuziuns online selecciunadas da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembars e commembers.